

四庫全書

集部

欽定四庫全書

弇州四部稿卷四十六

明 王世貞 撰

詩部

五言絕句三十七首

劉太常亟言大城令忽君之賢也其善狀非一至  
禱雨立澍矣予聞而賢之爲賦四絕句

試按扶風部應先數大城神依灌壇令民頌東先生

其二

自是神君雨那因少女風河陽萬壠綠千樹亦爭紅

其三

霖霖沾衣樂滂沱破塊寬好星元有雨星是漢郎官

其四

汝禱亦已久六事無可責密雲天際來宛然桑林色

過息題息媯

君王愛侵地賤妾偶酬心欲竟無言恨那堪言外深

買雞

兒童愛春懶爲買汝南雞不曉幽人意翻令拂曙啼

鄖陽偶成

坐見斜陽影離離西過楹問愁無可答底是少心情

其二

驟作中年身都無快心事不知筋與骨何處將衰至

茅阜峯

茅君顧我笑誰校從官多欲語囊中祕其如六耳何

健人峯

共工觸不周巨靈擘太華何似此健人立石天門下

繫馬峯

天馬走長空茲峯偶一繫萬象欲現時聊將繫吾意

滴水巖

一滴一露珠病渴猶恨少倘借行雨翁前村成浩淼

隱僊巖

真僊不住山那有山中跡同是謫僊人相逢不相識

風巖

一決土囊口居然萬壑同人應自寒暑風不解雌雄

獨陽巖

朔風寒不盡慘淡結浮陰念此閉關日悠然天地心

凌虛巖

希夷誦  
經所

誦經凌虛臺留骨希夷峽何似學劉伶未死先荷鍤

榔梅嶺

人言榔梅亭真果已堪證無奈老饕何只愛蘇家杏

青崖

斷崖數千尺隱然一輜輶即看搖落候不改芙蓉青

瓊臺

當時受冊地今日瓊臺宮阿母瑤池色能如晚照紅

淵默亭

茲亭字淵默我憩亦何言忽有天門闢森然帝座尊

試心石

陡出三尺崖下臨千尺地道人呼試心無心可將試

試劍石

我有昆吾劍不將持試石白壁隱荆山剖出長虹色

磨針澗

鐵杵磨作針白石化作金還憐磨杵客不勝化金心

蒿谷澗

野蒿長如人葦施亦不離我欲構一區爲延張仲蔚

金雞澗

遙望雞鳴峯神漢湧如射時聽金雞聲人間道天赦



摘星橋

即會仙橋

夜半橋上星如螢拂衣袂爲摘歲精來欲驗偷桃事

閒居無事偶憶古人恒語成聯者因以所感足之

不論其合與否也

何所聞而來何所見而去人自不關身身有關人處

其二

前不見古人後不見來者此事久已然如何初涕下

其三

蘭以香自焚膏以明自煎崑岡一失火頑石未聞全

其四

我自用法卿自用卿法卿法多愛憎我法無生滅

其五

莫言一種物雙名亦易曉處則爲遠志出則爲小草

其六

有情癡故佳無情點亦爾瑯琊王伯輿終當爲情死

其七

人言阿龍超阿龍故自超濟南一下語北地不成驕

其八

法護非不佳僧彌難爲兄長安嗽名地語語蘭芬生

其九

有兒不明經好讀子與史仲容已預之卿不得復爾

其十

解綬還神虎買舟向吳會冷如鬼手馨強來捉人臂

鄖府偶成

濁酒杯誰共殘燈影自親不應開閣後千騎上頭人

六言絕句一百首

偶成

游絲自縈白日疾羽忽界蒼烟先生中酒難起卧讀南  
華幾篇

戲題燕市所見

繡帽緹騎爭道雕欄貴人索錢羣兒馬通自給小婦牛  
飲高眠

其二

相君築堤西弄詞客待詔公車鳴騶定先宿鳥彈鋏不  
愁無魚

游薊城樓

登危不妨蠟屐踞坐自側烏紗鐵嶺高天一線漁陽落  
日千家

其二

青草春閒突騎黃雲晝慘穹廬揮鞭畫蒲類海立石封

狼居胥

秋日過于鱗郡齋分韻賦十二體

使君盡酒不醉郡閣先秋自寒乾坤乍容車馬湖海漸  
入衣冠

有聞

鵠告余以不好鵬語余以其期西山白雲自若東市黃  
犬何之

順義公署雜興

歸雲小樹先暝啄雪殘鴉自喧候吏強名栢府濁醪故  
作柴門

其二

架上道書數卷牀頭濁酒一瓢不作莊叟齊物笑他嵇  
生絕交

其三

空庭積雪無恙小牖青山自如何物消除官廩呼兒點  
檢琴書

風寒濟南道中兀坐肩輿不能開卷因即事戲作  
俳體六言解悶數之政得三十首當喚白家老婢  
讀之耳

有論已乖養性無書自成絕交且從李耳視舌不與陶  
潛鬪腰

其二

狗監故知犬子太玄自守童烏任他出山小草甘老東  
吳菰蘆



其三

愛弟策名京兆嚴君奏捷未央不才也能隨例年年管  
領長槍

其四

無思無爲足矣不笑不取何居生兒但識丁字慎勿讀  
父之書

其五

但誇酒賢酒聖莫論錢愚錢神爲龍爲蛇亦可應牛應

馬誰真

其六

小驛殘茅短籬偶爾濁醪一卮却似區區天地野夫寄  
此何爲

其七

趨府不休自憐人生幾許流年不羞挂名牛後所恨望  
塵馬前

其八

丈人石畔雲起女郎峯頭雨來可怕千秋望斷只愁風  
橫吹開

其九

薄薄斜陽剩照輝輝殘雪留姿天公任汝搬弄畢竟能  
過幾時

其十

賀監八旬捨宅白傅六袞分司那知七百年後笑殺李

家小兒

謂于鱗也

其十一

莫言無下筯處二十七種菜鮭自勸自斟佳客一丘一

壑人家

青陽驛在  
山水間

其十二

何用勞他白僕喚來將伴朱提去日薰猶莫恨到時還

隔雲泥

其十三

袖中束書數卷車後挂酒一瓢任爾風塵度日猶勝政

府逍遙

其十四

哥舒明駝難得道將快牛未逢借問長安相府何如兼  
領司農

其十五

檀氏沐猴無怪謝郎鸚鵡更工爲語當筵鮑老莫笑欽  
明八風

其十六

華不注何崎嶇青天削立峯岑寄語三周鐵騎其如一  
杖登臨

其十七

飯罷從容捫腹汝胡許大乃爾詩書淘洗欲盡空空如  
也而已

其十八

冠蓋人人白雪生涯處處青山莫怪攀龍任誕王生猶  
落人間

其十九

離騷未稱佳士壯叟竟不異人乞取楞嚴一卷消除幾  
日殘春

其二十

欲雪千山自暝將風萬樹知寒償債半生車馬誤人一  
世衣冠

其二十一

衣冠是處故人不如一吳國倫七品十年不賤千金片

語那貧

其二十二

脩脩檜栝風緊藹藹桑榆日斜莫怪牛羊不下中峯自  
有人家

其二十三

曹公治窟何意丙相問喘莫論止是輸他兩吏歌呼復  
吐車茵

其二十四



明年罷官歸去山田不論俸錢三山六水任意兩粥一飯安眠

其二十五

車公一言拜相李廣百戰不候自是人間常事莫將造物追求

其二十六

泣麟思鳳且止怨鶴驚猿莫論問君幾許經濟拋擲驃騎車門

其二十七

既少桓譚數語又無侯芭一人胸中萬卷何用到了還他渾淪

其二十八

何必陶公能賦杜鵑也歸去來生寧與雀等伍死不呼鳩爲媒

其二十九

世事一清一濁人情有愛有憎胸中八九雲夢何勞瑣

瑣溜澠

其三十

富不如貧魏擊生不如死曹涂片語千秋萬古兩袖三  
江五湖

即景二首

平林鳥驚新月小巷犬吠松聲主人酉酒未解稚子也  
倦逢迎

其二

斜陽遠山一抹流水桃花幾灣  
檣頭受風欺住缸面且  
自偷閑

醉後放言

快哉老伶荷鍾至竟還輸一籌死亦不須埋我教他蟻  
樂鳶愁

其二

神僊自有官府朝市翻誇隱淪何用爲渠評騭醉鄉且  
住逡巡

其三

杖頭一瓢共飲但醉莫問姓名無才無德老子半癡半  
黠先生

其四

秫田七百斛米屈指未了殘年東家新篴正熟耐可甕  
畔酣眠

舟行即景

落鴉千點萬點流水一灣兩灣漁燈南垞北垞鳥道前

山後山

謝吳總兵贈白苧幃

不須元帥武帳敢學中郎絳幃領取新秋白苧睡醒瑤臺露晞

夏日偶成不復倫次共得廿首復作長山道中故事耳

一貴一賤轉眼得意失意片言丈夫自管六尺莫擬輕受人恩

其二

眷屬偶然萍聚此身亦是蓬飄從他千古萬古何異明朝昨朝

其三

爲問夾穀周道何如耦耕老農六州鐵鑄成錯一尺布尚可縫

其四

穀秕不如稗成貴死不如賤生東家送喪鼓吹西家嫁

女哭聲

其五

在山亦名小草辭釣却喚陽鱈何似一羣鸞鶴飽喫鰕  
鱔腫霄

其六

小人請學爲圃愚公始愛移山不至終身錢孔似勝天  
下轍環

其七



劉項蝸角千里彭聃蜉蝣片時唯有騰騰酒睡喚作小  
劫須彌

其八

右丞輞川勝地少傳履道新居此生大堪假息身後豈  
必吾廬

其九

法書名畫古鼎詩卷茶鑪酒鎗人呼六一居士自號烏  
有先生

其十

試茶初動鱗眼臨帖更畫烏絲  
毀罷冷淘槐葉微吟雙  
調柘枝

其十一

姓名琬琰四海文字金石千秋  
祇堪曳尾沙畔那可跨  
鶴揚州

其十二

湖田未論厚薄頗堪伏臘之資  
吾意無可不可世途已

而殆而

其十三

車公一言拜相司馬三賦爲郎既與此人同世取舍更自茫茫

其十四

握管頗成快事銜杯差不讓人何曾在下援上亦否辭  
富居貧

其十五

重權一佩六印巧宦十至九卿八十日陶彭澤福薄苦  
要歸耕

其十六

時事十羊九牧世情暮四朝三莫憂深源難起自信中  
散不堪

其十七

有子萬事非足無官一身不輕僊人自來忍辱居士難  
矣淨名

其十八

脩羅怨爲兵刃調達謗作笙歌大梵天宮自在光明不  
照娑婆

其十九

黃雀入水爲蛤青鳩乘春化鷹升沈偶然所遇強弱豈  
爾之能

其二十

踰冠已叨銀艾三十謬領金緋總就迴波六字唯向君

王乞歸

題梅卷贈虛上人

羅浮寒玉千樹折贈闍黎一枝欲識西來真意暗風吹  
到軍持

其二

隴頭玉笛吹遍哀響不到僧家爲問阿師微笑世尊拈  
示天花

戲題

詞林豈必陽九世路自足朝三雞肋棄之有味羊腸欲  
上不堪

其二

蹉跎顏駟雙鬢落魄高陽一身彈章亦合文苑除目終  
疑酒人

再題

三十年前塗抹二千里外折腰磨蝎當宮合賤雕蟲小  
技誰驕

其二

臨邛負弩小事長沙賦鵬胡云那用爭他絳灌歸來笑  
擁文君

阻風黃石磯

桃葉江南江北桃花千山萬山捲簾但看白浪沾酒不  
減朱顏

其二

長江宛如白龍怒起鱗甲千重唯是江頭山色居然不



改芙蓉

疊字峯

千尺霞牋燦爛數行雲篆橫斜莫驚此峯疊字西去水  
亦成巴

金鼎峯

十年文火武火一夕星飛霧飛惆悵雲臺夜色子春獨  
自東歸

雲母巖

朶朶傲風雲  
葉層層薄日  
霜華傳得彭  
錢殮法移來  
此地爲家

黑虎巖

何事山君變服  
弭首玄武行  
宮不憂西華  
白帝可怕東  
海黃公

白龍巖

朝來卯色初動  
白雲四馳不  
寧疑是玉龍  
行雨滿山鱗  
甲崢嶸

硃砂巖

毋煩安期遣信何用勾漏遠尋方寸不生凡火大地盡  
作黃金

歛火巖

鄧天君修真之所

五十餘年清淨一念歛火纏糾却似班生投筆虎頭燕  
領封侯

皇后巖太子巖

太子宛如悉達皇后亦似摩耶一卷西來勘罷五斗無

復生涯

妙花巖

六銖姹女天衣貪散天花不歸我醉露眠巖側滿身花  
雨霏微

萬松亭

蘇門山人坐嘯華陽隱居卧游嚕然數部鼓吹猶自傳  
響山頭

龍泉觀

摩天羣峭石骨護壁萬綠松髯過橋泉聲忽怒破竇風  
意時尖

烏鴉廟

不學淮南雞犬一時相隨上天試問叢祠受賽何如江  
畔迎船

僊基石

山中爛柯樵者世上負局先生最是聖凡難別欲煩橘  
叟題評

雙溪澗

一泓鱗眼吐沫雙澗燕尾分流人道渭清涇濁俱從天

柱西頭

飛雲澗瀑布澗

急淙瀑布千丈飛雲冒絮百重更許餐霞煮石山人衣

食從容

天池

天上莫疑銀漢池底亦自青天白雲徐動玉皴明月初

起珠圓

鄧中雜言八首

晨興兩堰脫粟逼暮三杯濁醪幸不妨他黃卷猶堪拖  
故紫袍

其二

乍雨乍晴天色自開自落花枝蟻浮誰賓誰主蛙吹爲  
公爲私

其三

上書時時不報往事忽忽自嗔腰間有骨爲祟眼底無計藏身

其四

鄖山排坐西入漢水遶郭東傾話來頗令神爽飽看何曾眼明

其五

塗鴉半成梵字爲蠹三食僊名虞初稗官使者摩詰竺乾先生



其六

晚得一城斗大云胡不游漢隄見說宜城酒薄小兒未  
解銅鞮


其七

無才癡頑老子強學解事小兒吾耒如之何也胡不歸  
去來兮

其八

雨餘殘果自墮日落倦鵲爭喧手攜南華一卷不妨坐

待黃昏



弇州四部稿卷四十六

欽定四庫全書

集部

弇州四部稿卷四十八

詳校官侍讀學士

臣陸伯煨

中書

臣

劉源溥覆勘

總校官原任中允臣王燕緒

校對官中書臣張 塤

謄錄監生臣李青標

欽定四庫全書

弇州四部稿卷四十七

明 王世貞 撰

詩部

七言絕句一百三十首

殿前曲二首

磁垣鐵甲散晨光  
香篆微分金鳳凰  
武帳日遲風自捲

君王昨夜幸昭陽

其二

鴻錄瑤簪叩寶壇  
雲璈鳳管簇回鑾  
月明千片芙蓉影  
蟬鬢涼生七葉冠

莫愁樂

細娘家在大江頭  
總爲工歡字莫愁  
月明低按關山曲  
何處行人不淚流

平陽伎

楊柳堤邊控紫騮  
葡萄新錦費纏頭  
春燈徧照平陽舞

不信流黃一段愁

其二

玉爲歌管簇雕欄  
錦作蓮花捧翠盤  
一片新粧驚月色  
萬行瓊樹雪中看

閨怨三首

空城甲第與雲齊  
海燕無人不肯棲  
隔巷長干春十五  
銀箏偏喚一行啼

其二

聞道邊關樂事多前庭蹋鞠後庭歌不知刁斗聲中月  
曾照流黃錦上梭

其三

三殿論功拜徹侯平陽歌舞一時收無端却是刀環月  
更遣文君賦白頭

西宮怨二首

露井香生百合開夜深明月在青苔春風自怨歲華鎖  
那有西宮玉輦來



其二

點點蓮花漏未央  
乍寒如水透羅裳  
誰憐金井梧桐露  
一夜鴛鴦瓦上霜

小伊州

頻年轉戰未封侯  
還逐高陽酒伴游  
醉後祇今愁出塞  
雙鬟又唱小伊州

西興詞

留君無計恨匆匆  
盡酒停杯曲未終  
船到西興潮已落

明朝還起石尤風

青樓怨

輕風細剪越羅寒  
紅淚徐傾蠟鳳殘  
一曲停箏還自語  
不知春思爲誰彈

青樓曲二首

馳道高驂赤電飛  
橫擔蜀錦鬬雞歸  
新豐酒薄人難醉  
夜半猶歌金縷衣

其二



其三

朝來分隸李輕車  
揖客轅門意自如  
超距翹關三十萬  
何人領取豹韜書

其四

夜深鄰帳送胡笳  
三月春寒雪作花  
吹盡關山楊柳曲  
壯心元自不思家

其五

奇兵十萬擊匈奴  
谷蠡屠耆未擬俘  
對陣奪將金勒馬

獨身生致北單于

其六

蹀馬吹塵紫極昏  
洗刀飛血九河渾  
長城直拓三千里  
表取陰山作北門

其七

胡姬學得漢宮眉  
辛苦風塵損玉肌  
不爲青春容易改  
十年番地失馬支

其八

鐵騎橫驅瀚海塵  
戈船直擣瘴天春  
不知南北功多少  
羞作麒麟第二人

橫江詞四首

越女紅粧隱畫橈  
驚波無際雪山搖  
貪趨破鏡西陵約  
不怕風江八月潮

其二

江上檀郎來往頻  
婆娑妙舞賽江神  
來時風水隨船尾  
欲往驚濤好步勻

其三

錦纜羅帆翡翠舫  
長年催趁午時潮  
江頭楊柳深相恨  
折損春風幾萬條

其四

青江一線日邊開  
萬古東流去不迴  
聞道海波穿地底  
可能還向磧西來

甘泉歌

千尺通星井榦樓  
玉盤天酒夜來收  
白茅螭捧黃金印

五利明朝欲拜侯

秋宮曲

桂宮飄粟御筵香  
銀漏初添恩正長  
唱罷涼州天似水  
百花僊隊按霓裳

春宮曲

十二珠簾帖絳紗  
山香一曲駐飛花  
當筵拜領葡萄酒  
纖月雙彎襯臉霞

涼州曲



玉門春色勝臨洮  
敕使東來賜錦袍  
聞道酒泉香似酒  
不煩銀甕貯葡萄

其二

千帳奚王作外臣  
射雕歸暮管絃新  
笑來杯酒稱兄弟  
曾是沙場百戰人

採蓮曲

千枝婀娜朝陽風  
汎紅衣露碧房疑是吳王開水殿  
酒深初散越姬粧

楊柳枝

西蜀竹枝君莫聽且聽東吳楊柳枝是處春陰堪畫舫  
何村樹杪不青旗

其二

楊柳吳閶千萬枝橫塘風綰麴塵絲不緣游子無攀折  
總爲情人少別離

其三

飛花欲捲翠蛾顰浪打萍飄惱殺人猶勝洛陽東陌上

北風吹作馬蹄塵

其四

十月寒輕葉未凋  
淡黃疎綠短長條  
無情有態堪憐處  
日脚雲頭雨半腰

浪淘沙

晴沙萬疊倚江開  
不斷銀山滾滾來  
片晌只疑隨浪去  
千秋長自錦成堆

其二

潮來銀海欲連天  
潮落平沙故宛然  
得似古查能貫月  
一年一度女牛邊

蘇幕遮

碧魀朱毳紫金瞳  
翕日瀆波倒射空  
不爲偃師偏作眴  
大家元住化人宮

其二

魚龍曼衍戲如神  
簇隊金牌色色新  
珠簾不動天顏肅  
始信支那有聖人

弘治宮詞十二首

甲帳銀燈夜未央  
漸看鴛鴦有寒霜  
三千粉黛渾如掃  
聖主重繙日講章

其二

南海珠池貢已稀  
西川又罷錦文機  
朝來御服三經澣  
賤妾寧希曳地衣

其三

禁苑先朝紅藥臺  
御筵親爲兩宮開  
莫嫌宮監希恩賞

玉輦何曾更一來

其四

午槐圓影覆彤除  
今日天顏喜氣舒  
穩坐御床無一語  
但稱難得老尚書

其五

五月鯁魚白似銀  
傳餐頗及後宮人  
躊躇欲罷冰鮮遞  
太廟年年有薦新

其六

黃帕朱奩覆御羞手題頒賜壽寧侯昆明督亢從渠請  
今日臺官在殿頭

其七

琵琶雙鴿暗凝塵玉指生疎調未勻自是經年無曲宴  
不愁供奉數中人

其八

御前黃蓋進羹湯玉筯頻停不肯嘗應是司農聞水旱  
蹙眉時讀兩三行

其九

靜數蓮籌第五更寒鴉金井未分明披衣欲坐猶疑早  
前殿連傳警蹕聲

其十

雪乳冰糖巧簇新坤寧尚食奉慈綸祈年好在齋宮宿  
莫遣羊車別院頻

其十一

掖庭愁閉自年年今日承恩雨露邊又是鋪宮新例薄



空勞少府積金錢

其十二

急遣追鋒召外家  
南宮桃李正如霞  
自從光祿裁宣索  
長日從容且賜茶

正德宮詞二十首

十年彤管侍先皇  
太液甘泉蔓草荒  
七葉神孫今好武  
苑西新闢鬪雞場

其二

蜀馬分弮對打球纖腰帖地浣青油金牌銀盃從渠愛  
誰敢爭先第一籌

其三

僊韶別院奏新聲不按唐山曲裏名青鷄白翎俱入破  
十三絃底似雷鳴

其四

金鰲橋畔柳絲長舴艋艙頭有柘黃六院少兒初病酒  
御前親自過魚湯

其五

兔首熊蹯載後車長楊輦道不須除  
勅教頒給言官了  
玉几知無諫獵書

其六

窄衫盤鳳稱身裁玉靶雕弓月樣開  
紅粉別依回鵲隊  
君王親自虎城來

其七

急勅甘泉暫解圍期門百騎少光輝  
中官昨夜聞歌管

知道初從長信歸

其八

玉水垂楊面面栽  
豹房官邸接天開  
行人莫愛纏頭錦  
萬乘親歌壓酒杯

其九

夜半毬燈出未央  
俄傳鞞鐸向平陽  
六宮處處秋如水  
不獨長門玉漏長

其十

綈案東頭有皂囊不知疇日進封章付教河下金璫手  
莫遣君王甲夜忙

其十一

淡黃初纈草屠蘇側坐蕭家老禿駒薄暮西風吹袂起  
小龍團底露真珠

其十二

西師入座講蓮經勅許姪娥取次聽纓絡寶珠從密施  
莫留餘障在宮庭

其十三

平明東閣下恩綸獸鎧鸞翻色色新  
大內別開元帥府  
傳聲侍女莫稱臣

其十四

上陽宮裏進葡萄爭道沾恩色自驕  
小合黃封雙御押  
大官將賜霍嫖姚

其十五

六軍容衛自星羅熊館鷹房處處過  
此日靈臺顙候望

不知龍虎氣誰多

其十六

帳殿春眠日色饒  
掖垣簪珥自羣僚  
中官又啟排當就  
亭午傳宣且放朝

其十七

純銀八寶白如霜  
金豆離離出尚方  
撒放御堦憑拾取  
內人男子拜君王

其十八

百子池頭九子祠  
太皇恩許進香時  
深宮豈少宜男草  
何地曾沾雨露私

其十九

傳呼京兆進春牛  
百戲魚龍曼衍游  
雜遝香車看不見  
好登遼后洗粧樓

其二十

勅掃椒風第二房  
俱傳倩女出平康  
天宮欲曉人間事  
約伴相過話夕陽



西城宮詞十二首

芙蓉新樣紫霞冠  
細擁珠排小鳳團  
一片香烟叢裏出  
玉真朝罷簇迴鑾

其二

新傳牌子賜昭容  
第一僊班雨露濃  
袋裏相公書疏在  
莫教香汗濕泥封

其三

五雷壇上雷一聲  
海子閘口雨縱橫  
祈靈驗後催傳賞

馬上朱提玉手擎

其四

色色羅衫稱體裁  
鋪宮新例一齊開  
菱花小樣黃金合  
昨夜真人進藥來

其五

花底傳籌到五更  
隱囊斜倚到天明  
寒霜不敢蒙頭坐  
暖閣時聆磬效聲

其六

紅軒步輓碧油輪白玉堦頭不動塵阿監排當須次第  
喜來俱作放班人

其七

兩角鵝青雙筋紅靈犀一點未曾通自緣身作延年藥  
憔悴春風雨露中

其八

梨園弟子鬢如霜十部龜茲九部荒妬殺女冠諸侍長  
大羅天上奏霓裳

其九

鰲山烟火冠春城  
步輦龍旌倒褪行  
忽報大官供法酒  
玉音宣喚五先生

其十

西苑傳看白鹿歸  
金鰲橋下立依依  
不論供張能如鹿  
愁見鴛鴦接翅飛

其十一

侍女俱傳厭勝符  
貓爲鐵騎鼠爲奴  
擗擗一博天顏喜

八寶金錢踈地鋪

其十二

不御坤寧二十年玉堦埋月樹迷烟  
聯房自信無人到閒放獼兒自在眠

吳中迎春曲八首

十五女兒好容顏恰似楊花太劇顛  
貪過吳橋新水發濕着羅襦不解憐

其二

儂家少年來看春繡帽雕鞍色色新拾得金鈿便驕惜  
不道紅粧惱殺人

其三

弓鞋羅襪細溫存偏愛春泥印齒痕看到閨門天欲暝  
六街燈月照黃昏

其四

今年冰雪太遲春分外催花羯鼓頻行過貴家春不度  
隔簾呼住打毬人

其五

橋邊宛宛雙柳株  
賈客蹀躞千金駒  
停鞭半醉道春好  
笑入胡姬舊酒壚

其六

青天幻出木蘭舟  
對對妖童髮似油  
齊唱採蓮新樂府  
高樓拋下錦纏頭

其七

白髮田家一老翁  
欲行翻更仗兒童  
只問勾芒甚顏色

還呼社酒醉東風

其八

帝城風物倍光華却比吳閶少見花  
解道天街春尚晚不知先落五侯家

燕京四時樂四首

城南韋曲春可憐侯家鋪埒黃金錢  
即妨蹀躞要歸去十五搗箏楊柳烟

其二



東華空望碧欄杆  
高棟承雲赤日寒  
不是蒲萄渾難醉  
銀冰片片水精盤

其三

薊門霜葉馬初肥  
蜀錦輕裝七寶圍  
日暮金丸彈不盡  
紅塵一騎趁鷹歸

其四

青樓小婦熨瑤箏  
飛雪敲牕萬玉聲  
三十六簧寒不起  
自歌金縷到天明

古意

傳君移戍古梁州  
明月心懸隴水流  
莫怪夢魂逢不得  
書來依舊玉關頭

其二

莫誇靈藥鏡中過  
自是君恩薄更多  
不信雕弧摧九日  
却留明月隱嫦娥

咏戍卒

下六首  
少時作

夜靜風高角自鳴  
鐵衣長掛酒頻傾  
細君莫厭離家語

爭道明朝又出兵

其二

歲歲從軍出酒泉  
未知何日勒燕然  
相逢莫更嫌衰賤  
多少黃沙掩少年

送蔣子南歸

乍逐春風上帝畿  
如何短棹又將歸  
看君身似瀟湘鴈  
不厭年年南北飛

其二

潞水驛前雙畫橈送君頻上又相邀征衣半濕離筵酒  
心到閭門第幾橋

病起

推枕春林送曙鶯漸驚虛白上牕櫺書生貧病無他業  
一卷黃庭內景經

其二

蕭疎病骨怕逢秋伏雨斜風到枕頭一夜芭蕉惱不徹  
他自無情我自愁

計偕途中四絕句

閭門女兒粧髻輕  
三十四學銀箏行  
人不解絲中語  
都道陽關送別聲

其二

金陵望中山抹烟  
鐵甕城頭浪拍天  
居人盡說風波惡  
江口何時不放船

其三

日落徐河水亂流  
高城椎柝漏聲愁  
相逢欲解珊瑚玦

不見胡姬舊酒樓

其四

濟河北流復南流行到天津南北愁人生順逆雖有分  
耐可此身居上游

立春日與吳峻伯席上分韻呼采得一枝花

綺裯分彩占年華疊翅鴛鴦色並誇最是夜來春信早  
就中呼得一枝花

將還故鄉醉別燕中友人

葡萄新釀紫霞文  
累醕深卮謝數君  
挂席還依薊門月  
鳴榔初蕩闔閭雲

其二

酒肆藏名君不知  
別來方解問相思  
江南添個踈狂客  
蓮葉風前唱竹枝

戲題徐迪功五集後

一貧無夢到封侯  
屠狗吹簫不自由  
今日功成身亦貴  
可堪人記少年游

其二

十年家火煉凡鉛一日中原遇大還  
君自羽儀朝帝闕莫將鑪鼎悞青山

別于鱗子與子相明卿十絕

十年爲客問吳山錦纜安流此日還  
唯有故人歌一闋行雲不度似陽關

其二

鳴鞭醉色傲幽州飲馬滹沱水亂流  
明月獨懸南北淚



黃雲偏載古今愁

其三

西風獨許季鷹回紫酒青尊亦快哉八月吳江潮水發  
掛帆天際雪山來

其四

五子應從五嶽來鈞天帝享動天臺相逢此地原非偶  
散入中原豈乏才

其五

日觀峯高高插天天門雙闕俯蒼烟無人共拾金光草  
拄杖行吟望斗邊

于鱗

其六

扁舟八月向維揚素魄含波欲似霜北地翻傳廣陵散

故人天外意茫茫

子相

其七

徐卿抗疏擬烟霞白笈青鞋興未賒我繫漁舟問苔雪

玉簫吹破碧桃花

子與

其八

羅浮秋至重嶙峋  
漳水寒流月色新  
南北歸來俱自好

不知裘馬倦游人

梁公實  
謝茂秦

其九

褰裳去採漢江蘭  
日暮江深春水寒  
欲寄一枝君自賞

傍人應作艾蕭看

明卿

其十

當年季子去歸吳  
縞帶誰遺別思孤  
十二國風論欲盡

大帆明月滿姑蘇

別弟

別時攜手上河梁  
兩岸相看即異鄉  
獨立蒼茫歸騎晚  
春來月色倍如霜

其二

鳴鑣疊吹鳳池頭  
玉勒金羈控紫騮  
無那別時言不盡  
逢人日日問青州

見挾彈者偶作

黃衫挾彈市人看楊柳陰中百舌寒日暮建章秋色裏  
不知何處落金丸

即事三絕

闔閭城外閃旌旗盪寇樓船十萬師爲問幕中諸上客  
何人不揖羽林兒

其二

欲提長劍斬長鯨歸擁春農海畔耕縱有微勲麟閣上  
栢梁先遜侍中名

其三

謂趙氏也

護軍旌傳有光輝馬首黃金意氣歸挑盡機頭紅女淚  
又勞天子賜春衣

弇州四部稿卷四十七

欽定四庫全書

弇州四部稿卷四十八

明 王世貞 撰

詩部

七言絕句一百二十五首

送顧子行員外謫判太平五絕

天門秋色挂帆開  
候吏遙從采石來  
醉著錦袍明月下  
千年人道謫僊才

其二

晉朝姑孰接秦關  
飲馬淮流一線間  
今日中原無挿羽  
不妨詞客醉龍山

其三

客路仍聞送逐臣  
與君那得不沾巾  
秋雲桐栢離帆影  
霜落丹楓兩地新

其四

樓船疊鼓大江流  
別駕新開南豫州  
四郭春驕羅綺色



向來僊客不知愁

其五

公檄寒稀郡事饒  
試陪賓從上凌歊  
只今惟有黃山月  
猶似蛾眉恨未消

揚州訪張有功不值

遙聞李白在揚州  
銀甕葡萄晚自愁  
曲罷廣陵人不見  
蕭條楓葉映寒流

其二

當時恩譴異長沙春見唐昌兩度花幕府夜來頻問帖  
玉鞭金勒向誰家

寶應湖

波搖匹練界長空天濶千帆處處風入霧樓臺先暝黑  
隔林楓葉後霜紅

其二

長天漠漠水淙淙鼓吹中流引畫艘南人過此看不足  
北人即怕莫推牕

聞子相歸不能待寄之

桐栢江頭春鴈稀  
故人聞向日邊歸  
扁舟欲繫遙相待  
萬戶清霜夜搗衣

送家兄君美復之江右幕職

滕王高閣枕江開  
萬里濤驅雪色來  
幕府只今誰上客  
知君舊有子安才

其二

東湖水鋪如鏡平  
百花洲上百花明  
宮袍小舫醉歌去

笑殺襄陽空得名

其三

紫薇省中花正芬  
任他公檄自紛紜  
不妨傲吏烏皮几  
卧看西山生白雲

其四

吳江花發暮春衣  
暫逐童冠一醉歸  
君去正如彭蠡鴈  
年年還向薊門飛

其五

香鑪峯畔紫烟生  
鐵柱觀頭雷雨明  
麻姑僊人數相過  
倘到吳門好寄聲

暑中戲簡謝時臣索畫廬山障

亭午湘簾暑未殘  
謾勞朱李薦冰盤  
須君貌寄廬山障  
卧對飛流萬尺寒

即事偶成

閭闔兵戈夜啼薊  
門禾黍雉朝飛  
北人愁北欲南去  
南人愁南不敢歸

其二

不分朝回只晏眠  
春逢雨雪壓花天  
鄰家禁釀罷開市  
贏得囊中無酒錢

喜明卿舍人至口號

昨夜承明萬井開  
露寒星斗共崔嵬  
虛將紫氣歸燕石  
自有荆人抱玉來

寄臨清方符處士因問訊猶子元煥茂才元煥善  
書工新聲

春風錦纜三千舶  
夜月朱甍十萬家  
俠客新傳方處士  
彩毫題徧石榴花

其二

君家小阮不可當  
春日騎驢辭帝鄉  
醉後曲裁梁苑月  
興來裙掩墨池霜

還吳初抵閬門夜泊獨坐有懷

十載時時問故鄉  
歸來朋舊又相忘  
城頭弦月烏棲曲  
疑是幽州萬樹霜

嘲吳舍人新娶

汝去含香露未乾，欲憑春破紫微寒。  
片帆飛盡瀟湘雨，十二峯頭黛色殘。

題西濱隱君

隱君家住大河西，楊柳雙橈水拍堤。  
明粧落日浣紗女，夾岸桃花春欲迷。

再贈子與十絕

子與行余既以長歌餞別矣，臨岐悵然飛龍之



垂隔羽翼之無從也因復爲十絕以吳音度之  
棧馬躑躅行徒掩涕矣

問余何事滯燕京擊筑徐卿大有情此日悲歌向誰和  
涼風千樹起秋聲

其二

白虹高屬薊門秋風暝滹沱水逆流自是別離關氣象  
不須開匣問吳鉤

其三

東吳王生太可憐別汝灑淚西風前一榻梁間都不下  
自瞪雙眼看青天

其四

秋深桐栢水曾波明月輕帆鼓吹過倘遇少文煩致訊  
卧游山色不勝多

其五

吳王臺下水漫漫榆柳蕭條兵氣寒無那興來催棹去  
到時應自憶長安

其六

灞陵車馬斷行塵  
狂客新豐酒見親  
抵醉不曾交片語  
只今誰是語中人

其七

太湖南圻貯烟霞  
山繞菰城十萬家  
歸路莫愁雲色占  
飛流千尺瀉桃花

其八

罨畫溪頭秋水多  
紅粧百疊剪青羅  
醉後徧題蓮葉句

蘭舟翻入女兒歌

其九

寂寥揚子著書年誰似桓譚與太玄  
心賞共期千古在莫教零落借人傳

其十

李生騎馬向邢臺擁傳君仍去未迴  
一柱天孤撐震蕩千巖日墮失崔嵬

送表兄盧生南歸

大江南去水茫茫到日秋風爲解裝  
棲鳥漸閒人漸少不知何處是家鄉

其二

白雲無盡片帆飛樽酒踟躕浣客衣  
不爲別離生感慨故園今日尚能歸

題畫贈別王使君

杯酒踟躕日易曛青山處處惜離羣  
莫言秋色難分贈君自青雲我白雲

走筆二絕贈弈者劉生

曾陪太傅東山墅不向君王賭郡符  
敲罷一枰何所道片帆秋色滿江湖

其二

金溝清泚棟花香一局逢君坐夕陽  
莫向秋風誇石室人間歲月野夫長

贈蘇洲

此翁不知何許人醉墨灘漣若有神  
夜半酒醒尋不見

滿天風雨散龍鱗

于鱗寄太行諸篇走筆以謝

太行峯色黨青天  
刺史褰帷紫氣前  
中夜星辰低摘盡  
憶余飛贈薊門烟

夜半醉過子相

北斗下卓河西流  
先生醉歌吟未休  
不爲長安一片地  
何人能破古今愁

贈文都昌

挂帆南去楚天賒大庾峯頭明月斜我贈白雲仙尉去  
書來應報折梅花

別李邢州宗考功徐比部吳給事諸君時方有三  
輔之役

濁漳西圻未安流大麓千巖風雨愁五馬過題春已徧  
猶聞使者下邢州

其二

金河楊柳未堪齊馬首傳觴白日低俠客自來輕別甚



醉乘虹雨薊門西

其三

塞雲吹盡出榆關  
不斷冰天指掌間  
應是爾曹高興發  
忽驚飛雪捲燕山

其四

未從燕市賦招魂  
東海虛明孝婦冤  
爾道行春三輔徧  
蕭條秋色老中原

贈別于鱗還邢州

白雲寒鎖郡齋深  
人道朝天不可尋  
總爲股肱驅傳去  
仍勞明主賜黃金

其二

石門高峽沙丘臺  
紫馬春停天地開  
無限北風吹不到  
萬家明月待君來

其三

葡萄美酒玉壺寒  
寫向離筵淚並殘  
縱有隋珠高月色  
不知中夜向誰看

其四

薊門揮手各風烟並馬中原別思懸  
我欲東觀遼海日煩君西柱太行天

上巳與趙憲副郊游趙取小婦由關中適至口占  
戲之

秦中好女勝羅敷翡翠爲裳香作車  
不用相逢問夫婿東方千騎上頭居

其二

千金西去買娉婷萬樹梨花斂色迎  
聞道燕京誇被袂  
讓君先賦麗人行

盧龍署中偶成

朱簾翠箔過楊花睡起中庭日未斜  
却似深閨嬌小婦  
樓頭癡坐怨天涯

西山道起蒼兔草中逐之不得

馬頭蒼兔剪春風一線光騰杳靄中  
落日平原青草色  
不知鷹隼爲誰雄

盧龍署中有寄

山城小雨鷓鴣啼楊柳辭寒綠正齊我夢春閨獨不見  
怕乘雲雨問遼西

飲歐陽鎮朔即事有贈

琵琶曲按古涼州急管清尊玳瑁愁勸爾軍中高太白  
秋來應挂郅支頭

其二

旌旗春偃白龍堆教客休停鸚鵡杯歌舞未殘飛騎出

月中生縛左賢來

其三

欲從鈴閣借前籌  
姑衍條支一劍收  
爾自虎頭飛食肉  
不教猿臂羨封侯

其四

曼纓白馬下雙鵬  
降敵轅門氣不驕  
爲問渾邪能騎射  
可如新帥霍嫖姚

過懷來羅將軍駐兵因贈二絕

碧山無限鎖龍堆  
羌笛胡笳漢使哀  
日暮春風鳴白羽  
知君突騎射雕迴

其二

將軍按甲古嫵川  
萬馬驕嘶首偃天  
但使王庭能絕幕  
未勞車騎勒燕然

寄紫荊龔都督二絕

牙旗高擁黑雲間  
匣裏并刀龍雀環  
夜夜胡笳吹落月  
秋聲不敢近燕山

其二

關頭畫角鎖殘霜十萬奇兵易水傍却恨單于穿塞去  
不教飛將取金章

過于鱗郡齋分賦十二體

千峯西北擁蒼堯立馬寒雲豫讓橋俱道桂冠同指掌  
不知山色爲誰驕

衛河夜汎

衛河秋望接天迴大舩高帆擁月來爲問乘槎諸漢使



幾人元是謫僊才

其二

白波如練掣長空上下銀河一色通  
歌罷朝來新樂府  
滿天寒色起丹楓

懷徐子與

時使江南  
因還雪

馬首平城雨雪多故人僊棹雪中過  
寧知日暮江南曲  
不異秋風塞上歌

其二

駐馬相逢邢大夫玉卮親上紫醪酥俱稱漢使由來貴  
爲問徐卿定有無

懷吳明卿

時謫江  
西幕

使君車馬自風塵聞爾匡廬發興新落日千峯秋色裏  
不知何處鬪嶙峋

其二

遙憐李白在潯陽縱酒狂歌秋興長夜夜銀河紫斗色  
肯教龍劍吐風霜

題沈參軍竹林圖

誰家十萬碧琅玕  
箇箇春雲秀可餐  
我是王猷君更熟  
何妨一問主人看

提兵海上戲呈袁將軍

十年文戰薊門空  
東海兵符倚畫熊  
却恨少時疎劍術  
欲將身事白猿公

寄遼陽羅將軍

十年遼海鬪兵稀  
邊馬乘秋轉更肥  
共道嫖姚新按塞

不愁明月滿金微

其二

醫無閭畔暮雲齊  
回首軍城萬壘低  
莫怪鮮卑驚白馬  
使君原是舊安西

調唐將軍

將軍盪寇大江還  
蹀躞霜蹄未擬閒  
自是封侯飛骨在  
任教明鏡負刀環

其二

十萬樓船下瀨兵已乾東海腊長鯨如何戍角依然在  
夜夜征夫向月明

吳峻伯校諸生走筆二絕

羣山秀色靜臨衙日暖風微絳帳紗萬馬自應空伯樂  
千人重見屈田巴

其二

何人東嚮坐諸生倡雪懸河稷下傾組練塗戈霜一色  
使君親教五家兵

和峻伯蓬萊閣六絕

坐看紅日映天雞  
曙色中原一瞬齊  
雄觀古來誰得似  
崑崙高柱大荒西

其二

虛無紫氣映蓬萊  
水落青天忽對開  
已借鰲簪爲島嶼  
還從蜃口出樓臺

其三

絳節秋逢鸞鶴羣  
安期遣信欲相聞  
袖中亦有千年棗

不羨瀛洲五色雲

其四

早晚蒼龍自在眠  
春波織就蔚藍天  
風雷忽捲秦橋去  
日月還依禹碣懸

其五

萬乘秋風屈布衣  
滄桑今古定誰非  
田橫五百應如在  
徐市三千竟不歸

其六

君汎僊槎擬問津我從東海學波臣隋珠却墜雙明月  
鯨島寒光夜夜新

于鱗嘗爲四懷詩寔首余世貞焉其次四寄某  
某子甲也乃世貞則亦首于鱗餘三人同之寄  
倍之矣風雨如晦飛龍垂隔每一諷詠淚下綆  
縻然又有私慰焉于鱗故已挂冠垂當得會耳  
寄以言托也是不必數子見之

懷于鱗



黃鵠秋翔太華顛坐攀僊掌撲青天  
乘風忽傍東溟轉  
矯首扶桑帝日懸

懷明卿

鴻歸重枉豫章書不向釣天夢帝居  
若使府公誇束帶  
便攜妻子入匡廬

懷子相

越王山擁七閩秋天入東南大海收雨後  
虹霓看不見  
何人截取釣鰲鉤

懷子與

武平之山勝武夷汀江如巴學字移但道江山多氣色  
不知新著謝公詩

寄俞仲蔚

病後青山足卧游愁時白雪自爲酬開門草色迷三徑  
刺史干旄不可求

寄謝茂秦

亦知留趙魯先生片語能尊萬乘名何事平原無上客

却教雙壁贈虞卿

寄李伯承

漢帝秋風在栢梁一時詞賦有輝光  
那知此文園令猶有金莖露未嘗

寄盧次楨

大伾山頭花滿烟春來竟日酒鑪眠  
不知妻子關何事乞取囊中賣賦錢

寄魏順甫

白雲高省意蹉跎華髮蕭條掩鏡過莫怪相聞多楚調  
秋風自傍楚人多

寄余德甫

當年握手帝城春館客平津日夜新君自誤傳流水調  
朱門只許抱筇人

寄張肖甫

離亭太白瀉流霞馬首橫刀意氣誇一自相如歸使後  
至今春雪滿三巴

寄應在明

寒燈暈碧影重重匣裏吳鉤欲化龍  
莫向尊前論舊事  
滿天霜色鎖芙蓉

于鱗慰余哭子有答

讀罷新詩涕暗垂  
朱簾愁對月如珪  
自來天上無知己  
虛怨庭前玉樹枝

其二

十年空抱兩麒麟  
依舊天涯一病身  
欲付五車王粲去

薊門猶有受書人

戲呈王僉憲入賀

故人相見時相及但道嵇生懶自如  
囊裏俸錢沽酒盡不須重草絕交書

過靳八公題壁

相傳靳題十字於壁已遂僊去筆畫道偉勢若  
飛動而不可識余時已醉遂信筆焉

縱橫風雨尚如新下馬摩挲讀未真  
此際靳公應大笑

笑余虛是謫僊人

其二

虬書畫隱薜蘿寒石髓如粳絕可餐  
但得長生似王烈  
不須重索秘文看

答吳峻伯

李生華嶽吾岱嶽各有新詩在上頭  
不散星辰南北極  
未交風雨占中州

吳書來云近得足下太山李  
于鱗華山詩何處更着吾手

其二

才看鳴鏑破垂楊又報金城一葉霜爲問飲飛諸惡少  
何人先縛左賢王

其三

峯迴天目柱天南千尺飛流百尺潭奉使相如曾不到  
却教秋興屬盧枏

雪後有懷數君子率爾相問

聽罷塞鴻愁更少夢迴池草思偏多疎籠雪墮驚鸚鵡

誤報風流刺史過

李有鸚鵡  
予至輒報



右李太守

小徑端爲二仲開至今籃輦不曾來  
山陰最好乘舟夜怕遣王猷興盡迴

右李給事

爲問萋迷金谷地可能推倒玉山無  
輕絃莫度思歸引自寫新詞付綠珠

右石給事

虛勞從事青州暖任遣梁園白雪寒  
一自主人蓮社後

冷家庭館勝袁安

右冷太僕

李憲使示蜀中諸詩率爾酬答

芙蓉萬仞插天寒  
樂府新傳蜀道難  
把向風流賀賓客  
不知還擬謫僊看

剪鶴翅偶成

并刀初剪六銖衣  
欲向瑤池夢裏飛  
此日還應爲竹住  
他年不許伴琴歸

其二

慚愧開籠支道林  
祇憐寒月九臯音  
不辭放爾翬天去  
弱水丹丘何處尋

道得薊門書舍弟生一子口號

銀箭初調玉露零  
乍啼開府試來聽  
不知奎壁光多少  
添得荀家最小星

書懷四絕

上馬琵琶別漢宮  
玉顏休更怨東風  
看他前殿麒麟閣

也自黃金問畫工

其二

休言談笑却邊烽  
秦將功多自不封  
一片平陽歌舞月  
可曾雙匣照芙蓉

其三

早聞金印出長安  
諸將人人擬築壇  
却向樂通侯館去  
玉關雙鬢不勝寒

其四

相如元自倦爲郎五馬雙鞭也不妨聞道枚臯方獻賦  
可煩含筆待長楊

十五夜夢中作

落日長穿虎豹羣鵬鷃初淬五星文羞言尺八專諸鐵  
不挂徐卿墓上雲

感懷

戰罷西風萬樹殘又看桃李徧春山不知天地元何意  
惟有長松了不關

其二

年年秋色飽雲門  
留滯殊深聖主恩  
莫向山城輕白日  
請看風雨易黃昏

醉調徐汝思不飲

去辭杯酒讀兵書  
明月青山恨有餘  
我自三騶車畔飲  
看他千騎上頭居

高唐王席上有懷齊東故王

一曲清商露未收  
坐間枚叟淚潛偷  
那堪花萼樓頭色

半入池塘夢裏愁

高唐王郎夜宴口占


翡翠春溫金屈卮  
青天璧月浸蛾眉  
君王莫更留髭飲  
政是能勝一石時

送客呂生謁趙生因問謝山人

叢臺歌舞四時春  
君去平原客更新  
雙璧連城都不換  
却教將贈立談人

其二

平明策馬渡漳河  
回首東秦紫氣多  
若見謝榛應借問  
不知華髮傍誰過



弇州四部稿卷四十八